



Sabtu, 27 Agustus 2022
Ogen: Roma 12:17-19



Meriah Ras Kerina Kalak



Nande Kuskas berkat ku sada kerja. I bas kerja e ialo-alo si mada kerja ia, janah ituduhkan me inganna kundul erpalasken tegunna ku kerja e. Sope denga ia kundul itatapna inganna i ja nge si tengtengna ia kundul, sabap basingan e lit kalak sideban si kurang si cocoken ras ia. Erdandanken si e daramina lebe inganna kundul si banci la pedeher ras temanna si la cocoken ndai.

Lagu langkah kalak Kristen, jadi sada orat geluh si man dalanenken bas kegeluhen si tep-tep wari. Nina Paulus "Asa ngasupndu usahakenlah merih kam ras kerina kalak" meriah ras kerina kalak enda buah bas perdamen. Kune lit kalak si erbahan jahat man banta, ola balas kejahatan e. Jesus pe ngatakan "ola kam erbalas nandangi kalak si enggo ersalah man bandu" (Mat. 5:39a). Erbalas e la dahin kalak si erkiniteken, apaika ngkirai salah kalak. Erbalas e bagin bas Dibata nari kap, IA hakim si adil, si ertatak kerna kerina kegeluhenta. Janah si jadi baginta e me ngeluh erdame entah pe meriah ras ise pe. Meriah ras ise pe maba ketenangan kap.

Kegeluhen nande Kuskas jadi saja pembelajaran man banta, maka la siperiahen e banci mbatasi kerna perdalinen bage pe pergeluhta. Adi lit la siperiahen tentuna erbahanca erpilihan temanta, mesunah tersinggung (gejap-gejapen) bas ranan bage pe perbahanen kalak sideban, janah kai pe silakoken kalak sideban (silaperiahen ndai) la mehuli entah la teralokenna. Adi si ukur-ukuri me seh kal nge rugina kita kune la si periahen. Uga ka adi siperiahen, ya meriah si akap, ralau cakapta, dengen uga pa pe tambah kesehatenta dengen durma dagingta. Erdandanken si e mari dage tetap si babai dirinta guna banci erdame. Labo kerina kalak banci bagi sura-suranta. Dibata nepa kita alu kinierbage segelah banci sikuhen, ngasup ngaloken sada ras sidebanna uga litna, e maka meriahlah ras ise pe.